

欽
定
全
唐
文

欽定全唐文卷五百七十目錄

柳宗元二

禮部爲百官上尊號第一表

禮部爲百官上尊號第二表

禮部賀冊尊號表

爲京兆府請復尊號第一表

爲京兆府請復尊號第二表

爲京兆府請復尊號第三表

代京兆府耆老請復尊號表

禮部爲文武百寮請聽政第一表

禮部爲文武百寮請聽政第二表

禮部爲文武百寮請聽政第三表

賀踐祚表

禮部賀改永貞元年表

禮部太上皇誥宜令皇帝卽位賀表

禮部賀立皇太子表

禮部賀皇太子冊禮畢德音表

爲王京兆皇帝卽位禮畢賀表

代韋中丞賀元和大赦表

禮部賀冊太上皇后及德妃表

禮部賀太上皇后冊畢賀表

御史臺賀嘉禾表

禮部賀嘉禾及芝草表

京兆府賀嘉瓜白兔連理棠樹等表

禮部賀甘露表

禮部賀白龍并青蓮花合歡蓮子黃瓜等表

禮部賀白鵲表

禮部賀嘉瓜表

爲王京兆賀嘉蓮表

欽定全唐文卷五百七十

柳宗元二

禮部爲百官上尊號第一表

臣某言伏以聖王之纂承天位也臣子必竭懇誠獻尊號
安敢爲佞禮在其中一則以告天地神祇二則以奉宗廟
社稷三則以安華夏蠻貊巍巍大稱其可廢乎臣等誠歡
誠望頓首頓首伏惟皇帝陛下協周文之孝德齊大禹之
約身宏帝堯之法天過殷湯之解網未踰周月四海將致
於時雍甫及元正率土更欣於再造然神人之願億兆之

情有所不安率謂未盡善者以爲帝德廣運而尊號猶闕
郊廟備禮而祝嘏無辭凡百兢懷華夷屬望臣謹按昔臯
陶之頌舜伊尹之頌湯皆臣子至公面揚君父以敷於當
代以播於無窮夫豈飾哉率由事實帝王尊號蓋漸於此
皇家光被四表祖宗烈文時當太和尊號表德耳目所接
簡牘斯存稽之於前典則如彼考之於聖朝則又如此今
龜筮習吉元正戒期當品物惟新之時乃皇王大禮之日
陛下郊天地享宗祧陰陽協和動植交暢不建至尊之稱
恐違列聖之心所以臣等冒死陳聞請上尊號伏惟陛下

小抑一作謙讓之節安延企之情特召名儒禮官百僚庶尹
詳明故實議崇聖德則人望允厭神心獲安山川效靈光
贊無疆之壽祝史陳信永彰不朽之功臣等蒙國寵榮備
位班列無任懇望之至

禮部爲百官上尊號第二表

臣某等言臣等再陳丹悃謹獻鴻名天心未從隕越無措
臣某等誠惶誠恐頓首頓首謹按堯曰咨爾舜舜曰格爾
禹湯曰吾甚武自號曰武王則堯舜禹湯皆當時王者之
號也考皇帝之故實徵往聖之憲章允協禮經煥乎圖牒

伏惟皇帝陛下允恭克讓約已謙尊參天兩地之功爲而不有安上理人之德置而不論至哉王言非羣下所能仰望也然臣等伏以爲尊號者所以類上帝饗祖宗萬人所稱百蠻所仰表聖德於率土播天聲於無疆臣下請之之謂禮帝王承之之謂孝孝大於讓禮先於謙百王不刊之典安可得而廢也臣等又以春秋本於五始元者一歲之首春者四時之首王者受命之首正月者政教之首郊天大禮者立極之首今天地交泰俯臨元辰正始之美正當其運陛下確違羣願固守謙冲此臣等所以兢惕失圖惴

惶無措上冒嚴憲敢逃厚責伏乞俯垂天聽察納微誠詔
禮官議臣所請揆日推禮虔奉鴻休盡敬於此猶恐天光
未照三獻無徵彷徨闕庭伏待斧鑕無任聳望之至

禮部賀冊尊號表

臣某伏奉月日制陛下膺受尊號率土臣子慶忭無窮臣
聞立極之大四海無以報神功配天之尊萬物不能崇聖
德惟有徽號是彰中興所以上探天心下極人欲中謝伏
惟元和聖文神武法天應道皇帝陛下統承千載光被六
幽蝨賊盡除福應皆集有首有趾咸識太平勲臣增爵祿

之榮戎士加賞延之寵片善必錄微功盡昇獨惟聖謨事
絕酬答萬國缺望百工怨思是以啟元和之盛典延昊穹
之景祚理厯凝命實曰聖文和眾定功時惟神武運行有
法天之用變化乃應道之方鬼神協謀夷夏同志大禮既
建鴻恩遂行歡呼遠匝於九圍滲漉普周於八裔慶超邁
古美冠將來臣獲守蠻荒遠承大典潢汙比陋河清幸遂
於千年塵壤均微山呼願同於萬歲無任慶賀屏營之至

爲京兆府請復尊號第一表

臣某言某月日諸縣耆老某等若干人詣臣陳狀辭意迫

切以陛下尊號未復請詣闕上表者人心已鬱安可久違
天意實勤諒難固拒撫狀感悅深契微誠臣某誠懇誠迫
頓首頓首伏惟皇帝陛下聖神之功貫於天地文武之道
超乎古今盛德愈大而謙光益深元化已成而徽號未復
遂使神祇缺望人庶怨思沐浴鴻澤者敢懷晷刻之安捧
戴皇恩者不知寢食之適負愧懷憤萬方一心日月以冀
遂淹星歲況今地不愛寶致百穀之豐穰天惟降衷呈眾
瑞而繁委汙萊瘠鹵之地混成大田草木蟲獸之微化爲
神貺萬靈垂鑒昭然甚明此而不從臣所大惑矧又兵戎

永戢夷狄咸懷煦然長春樂以終日是以耆老等深感聖
育踴躍不寧上奉天恩跼蹐知懼頓顙闕下願復鴻名不
謀而同不期而至此皆上元幽贊以誘其衷列聖垂靈以
悟其意臣以爲陛下當敬承斯旨不可忽也臣又伏以陛
下賞功與能舉賢出滯小言不廢片善是褒豈可使臣子
之效雖微而必旌君父之德盡美而無稱凡在覆載不勝
懇禱惶恐之至謹封耆老等狀奉表昧死陳情以聞謹言
爲京兆府請復尊號第二表

京兆府長安縣耆老臣石靈等言伏奉墨詔批荅臣所請

復尊號未蒙允許者捧對惶遽不知所裁天實命之於臣
何有臣等誠懇誠懼頓首頓首臣聞聖君以奉天爲心不
以執謙爲德以順人爲大不以崇讓爲優今陛下深拒天
人之誠猶懷謙讓之道臣等愚惑未知所歸且百祥荐臻
特表昊穹之睠五穀蕃熟用彰后土之勤億兆嗷嗷籲天
請命上下交應幽明同心舉而違之臣所未識况臣等共
被仁育同臻太和陛下德達上元以豐臣之衣食道躋壽
域以延臣之歲年沐浴皇風二十餘載兒童感化鰥寡知
恩故臣等出鄉之時歡呼遍野閭里勉臣以不進不止妻

孥誓臣以不遂不歸惟竭血誠退無面目便當殞首闕下
終不徒還伏惟陛下照臣懇迫之情哀臣羸老之命臣等
不勝嗚咽慚恨之至謹奉表陳謝以聞

爲京兆府請復尊號第三表

臣某言臣伏以耆老等並發丹誠將貫白日請復徽號以
光聖謨臣以其懇款自中不可禁止遂抗表陳請備述微
誠伏奉墨詔批答未蒙允許者衆心尚阻天意未從懇迫
愈深兢惶無措臣某中謝伏惟皇帝陛下道大益謙化成
彌損雖江海善下每應朝宗之心而日月居高久稱照臨

之位况復上承天命下覩人誠若然辭之理有不可伏以
陛下功參造化政體乾坤萬邦宅心百靈效職此聖之至
也明並兩曜信如四時先天不違窮神知化此神之極也
道德純備禮樂興行宸翰動於三光睿藻窮於六義此文
之備也五兵不試七德咸宣殊方者知歸負固者率服此
武之成也黃龍皓兔甘露慶雲神禾嘉瓜祥蓮瑞木萬物
暢遂百穀茂滋此天之至靈也黎老班白伏守闕庭鰥嫠
童幼謠歌道路此人之至誠也有其德而無其號拒乎天
而違乎人雖陛下謙讓之至美抑非臣心之所安也伏以

賤志難明微誠莫達戴天彌懼履地益慚不任懇迫屏營之至伏願早建大號以稱天人之心謹再奉表昧死陳請以聞

代京兆府耆老請復尊號表

京兆府長安縣耆老臣石靈等言臣伏以陛下尊號未復一十九年盛德彌光大化益被加以休徵咸集福應具臻至於今歲紛綸尤盛風雨必順生長以時五稼盡登萬方皆稔神意人事正在於斯天不可違時不可棄臣等誠懇誠迫頓首頓首臣聞恩深必報德盛必崇以陛下九重之

尊推崇無上以陛下四海之大報效何施惟有尊名用光
聖理闕然未復誰所敢安臣心則微天意甚重伏惟皇帝
陛下體昊穹以施化虔上帝以致誠今卽萬祥應期百神
奉職飛走之物皆已效靈草木之類咸能應聖天命降於
上人誠發於中此而可辭孰云有奉况野多滯穗畝有餘
糧足食之慶充溢於京坻阜財之謠歡呼於道路盡非人
力皆是天成神祇之望旣勤遐邇之心又迫况臣等得生
邦甸幸遇盛明身體髮膚盡歸於聖育衣服飲食悉自於
皇恩被元化而益深望鴻名而未覩懇禱之至夙夜不寧

謹詣光順門昧死請復聖神文武之號以副天地宗社之心使海內赤子得安其所臣等不勝懇禱迫切之至謹奉表以聞

禮部爲文武百寮請聽政第一表

臣某等言臣聞大道必體於至公大孝莫高於善繼上觀列聖旁考前王罔不俯就禮文仰承大事嚴奉宗廟慰安元元然後德教惟新邦家永固伏惟皇帝陛下寢苦泣血號慕無時貫於神明動於天地未臨庶政猶徇至誠凡在人臣孰不哀懼伏惟先聖遺旨俾陛下抑哀而聽政本朝

乏人使臣等竭忠以奉上非敢懼死輒布懇詞期於必從以慰宸宇且王業至重軍國方殷一日萬幾不可暫闕伏願追尊顧命蹈履成規恢王者華夷之望順上帝乃眷之懷臣等不勝哀迫誠懇之至

禮部爲文武百寮請聽政第二表

臣某等言臣聞聖凡殊途邦家異禮故王者捨已從物用身許天雖居達喪猶以事奪伏以大行皇帝道成鑄鼎僊等御龍萬姓長號九有禺望陛下以聰明睿聖嗣守寶圖爰及宅憂迨茲累日而孝思罔極尚輟乃雍之言庶政未

釐頗闕如絲之命臣等嘗覽載籍羸知喪紀若成周顧命
歷代猶遵西漢詔音前王所奉我國家以孝理天下文明
應期上用此法胥以傳授蓋事歸至當則不可不遵禮貴
從宜則不得不守理固然也臣等是以上陳愚懇輕瀆宸
嚴冀遂血誠俯親國政而陛下執喪逾切聽理未聞億兆
嗷嗷不知所訴臣以爲天子之孝在於保安社稷司牧烝
黎功超百王慶流萬代亦何必守臣下之小節蔑皇王之
大猷固阻羣情務成謙德伏願以遺詔爲念奪在疚之懷
就臨軒之制天下幸甚

禮部爲文武百寮請聽政第三表

伏以萬幾至重遺旨難違再獻表章上塵旒扆精誠徒竭
天意未迴內外遑遑人神企望臣聞王者之孝異於匹夫
禮不相沿道資適變當承平之代故殷帝宅憂而不言遇
有事之時則周王未葬而誓衆况今戎車猶駕邊候多虞
兩河之寇盜難除百姓之瘡痍未合亂者思理危者求安
天下嗷嗷正在今日誠宜抑其至性以副羣心成先帝之
大功繼中興之盛業豈可寢苦啜泣庶政闕然九廟之靈
何報萬方之望何塞臣等職參樞近誠切邦家若陛下未

忍臨軒尚持前志臣等有死而已不敢奉詔不勝哀懇迫切之至

賀踐祚表

臣某言太子中舍嚴公弼至奉某月日敕書慰諭伏承陛下以某月日虔奉典冊允昇寶位凡在羣生孰不慶幸臣某誠歡誠忭頓首頓首臣聞天地泰而聖人出雷雨解而品物榮是以五行迭用木火更其位十葉重光宗廟輔其德殷宗恭默再開成湯之業漢文聰明克承高祖之緒陛下重離出曜體乾繼統主鬯彰孝恭之美撫軍著神武之

功欽承遺訓永保鴻業遏密之中施雨露以被物遐邇之地覩日月之繼明則四維之外八極之表人神胥悅草木皆春煦嫗生成不失覆載况臣謬膺藩守累受國恩爰自出身泊乎領鎮沐浴聖澤優游昌時不獲覩闕庭之禮展臣庶之分戴天賀聖倍萬恆情

禮部賀改永貞元年表

臣某等言伏奉今日誥今月九日冊皇帝改貞元二十一年爲永貞元年自貞元二十一年八月五日昧爽以前應犯死罪特降從流流以下遞降一等者寶命方始聖厯用

彰載宣臨照之明遂施渙汗之澤臣某等誠慶誠賀頓首
頓首伏以重光下濟積慶旁行漢祖推奉教之尊文王遂
無憂之志正名紀厯表運行於萬方宥過輕刑流汪濊於
四海歡呼忭蹈遐邇攸同臣某等親奉聖謨仰承大化踊
躍之至倍萬恆情無任蹈舞欣慶之至

禮部太上皇誥宜令皇帝卽位賀表

臣某等言伏奉今日太上皇制命陛下卽皇帝位光奉寶
圖丕承鴻業溥天率土慶躍難勝臣某等誠喜誠抃頓首
頓首臣聞皇建其極存諸大訓帝出於震著在易經繼明

以照於四方重熙以臨於萬國動植品彙永賴昭蘇山川鬼神咸用欣戴臣某等獲備班列親仰聖明踴躍之誠倍萬恆品無任忭躍喜慶之至

禮部賀立皇太子表

臣某等言伏奉今月二十四日制廣陵郡王宜冊爲皇太子改名某仍令所司擇日備禮冊命者天序有奉皇圖載寧臣某等誠慶誠賀頓首頓首臣聞尚書載以貞之文漢史傳早建之議不惟立愛期在繼明陛下奉率前規敷揚盛典顧茲守器之重爰正承華之位尊義方之教載錫嘉

名崇建樹之禮式光典命以長而立自符於慎擇必予之
選遂合於至公邦本不搖王業彌固此皆宗社垂祉啟佑
皇心乾坤合謀保安聖運足以播休氣於四海洽太和於
萬靈食毛含齒所同歡慶臣等奉承制命蹈舞周行踊躍
之誠倍百恆品無任慶忭感悅之至謹奉表陳賀以聞

禮部賀皇太子冊禮畢德音表

臣某等言伏奉今日制書皇太子冊禮云畢思與萬方同
其惠澤者盛典斯舉鴻恩遂行凡在率土不勝忭躍臣某
等誠喜誠賀頓首頓首伏惟皇帝陛下克奉神休以正邦

統建天下之本宗廟以安致萬國之貞兆人攸賴典冊旣
備慶澤載流旣廣愛而推恩亦好生而布德緩刑而囹圄
知感進勳而嗣續增榮崇教諭之方忠良是舉嚴贊襄之
禮賜與有加旌孝弟以厚於人倫敬鬼神而修其祀事况
行禮之日則屏翳收蹟太陽宣精用彰出震之休更表重
離之曜神化旁暢皇風遠揚自華及夷異俗同慶臣等謬
參著定倍百恆情無任歡慶踊躍之至

爲王京兆皇帝卽位禮畢賀表

臣某等言臣聞大人繼明百神所以受職天子有道萬國

由是承風伏以皇帝陛下纘聖垂休順時御極負展而會
朝夷夏踐祚而統和天人幽明感通遐邇昭泰遂使祥光
下燭嘉氣旁通周王謝流火之符魯史愧書雲之典食毛
含齒歡忭無窮臣某等幸覩昌時獲奉大慶踴躍之至倍
萬恆情無任蹈舞欣躍之至

代韋中丞賀元和大赦表

臣某言伏奉正月二日制書大赦天下永貞二年宜改爲
元和元年者太陽旣昇煦育資始霈澤斯降膏潤無遺臣
某誠慶誠賀頓首頓首伏惟皇帝陛下仁化旁流孝理宏

闡紀元示布和之令肆眚見恤人之心曠然滌瑕得以遷
善渙發大號申明舊章農有薄征市無強賈勲勤是錄爵
秩以班寵寧間於幽明澤必周於夷夏近甸輕椎酤之入
遠人忘水旱之災旣行慶於官僚亦推恩於天屬諸生喜
黌塾之廣庶老加絮帛之優量入所以備凶興廉期於變
俗爰褒有客尊賢之典惟新載奉素王宗子之道斯在綸
言一降庶政畢行懷生之倫感悅無量臣某等守在遐遠
親奉詔條踊躍之誠倍百恆品無任感恩忭舞屏營之至
謹奉表陳賀以聞

禮部賀冊太上皇后及德妃表

臣某等言伏奉今日日誥良娣王氏冊太上皇后良媛董氏冊太上皇德妃宜令所司備禮冊命者母儀有光坤道克順陰教方行於萬國內理克和於六宮臣某等誠慶誠賀頓首頓首伏惟皇帝陛下對若天休奉揚睿旨長秋既登其正位禴狄亦被於恩光奉養見三朝之安周旋有四星之輔豈獨配乾稱大助日爲明所以表王化之源知孝悌之本冠映千古儀刑四方臣等捧戴施行踴躍無地無任蹈舞欣喜之至

禮部賀太上皇后冊畢賀表

臣某等言今日太上皇后冊禮云畢率土臣妾慶忭無窮臣某等誠慶誠賀頓首頓首伏以太上皇后著虞嬪之至德嗣周母之徽音表率六宮明彰萬國陛下克修理本以暢化源神道之事地之方人倫識尊親之大豈惟婦順斯備陰禮用修足以播正始於王風致時雍於帝典臣某等謬塵榮位獲覩盛儀踊躍之誠倍萬恆品

御史臺賀嘉禾表

臣某言今日宰臣以幽州所進嘉禾圖各一軸示百寮

者伏以嘉穀順成靈貺昭格天人合應遐邇同風臣某誠
歡誠慶頓首頓首伏惟皇帝陛下睿謀廣運神化旁行植
物知仁祥圖應聖靈嶽不愆於贊祐燕谷用遂於生成豐
稔旣均知朔南之被澤休嘉克協見天地之同和六穗慚
稱於漢臣異畝恥書於周典自中形外均慶同歡臣某謬
職憲司獲覩休瑞無任忭躍之至

禮部賀嘉禾及芝草表

臣某等言伏見今月某日内出劍南所進嘉禾圖及陝州
所進紫芝草示百寮者珍圖煥開瑞彩交映遐邇偕至福

應攸同臣某等誠慶誠賀頓首頓首伏惟皇帝陛下緝熙至道保合太和天惟發祥地不愛寶嘉禾擢質靈草抽英獻於王庭唐叔慚同穎之異薦諸郊廟班史謝連葉之奇旣呈疑疑之祥更覩煌煌之秀豐年斯著聖壽用彰飲和之人歡忭無極臣某等優游至化披翫殊姿慶忭之誠倍百恆品

京兆府賀嘉瓜白兔連理棠樹等表

臣某言今日中使王自寧出徐州刺史張愔所進嘉瓜圖及白兔兒一並出陳許等州觀察使上官說所進許州

連理棠樹圖示百寮者惟天眷命是降百祥惟聖欽承用
膺多福臣某誠慶誠賀頓首頓首臣伏以太和所蒸至德
斯應圖物獻瑞周於遠方神瓜合形式表縣縣之慶異棠
連質用彰韡韡之榮况金風發祥白兔來擾告有秋之嘉
應著成歲於神功雜還紛綸如山斯委人盡登於壽域物
咸暢於薰風况臣特感深恩欣逢衆瑞踊躍之至倍萬恆
情

禮部賀甘露表

臣某言中使王自寧至伏奉宣聖旨出延和殿前丁香樹

甘露一大合示宰臣未時又出一大合令明日示百寮甘露見降未止者元化昇聞靈眎昭答必呈尤異之應以告天地之和臣某誠歡誠慶頓首頓首伏惟皇帝陛下均煦育之功敷滂漉之澤太和潛達闕瑞克彰發於天霄特降宮樹朝光初燭方湛湛而不晞畏景轉炎更瀼瀼而未已綴葉而珠璣積耀盈器而冰玉呈姿芳襲椒蘭味兼飴醴然則零其庭而著異紀於年以標奇徒矜往辰孰並茲日况樹有丁香之珍殿卽延和之號所以著芳風之遠播期聖壽於無疆事絕古今慶傳遐邇臣謬承渥澤獲覩殊祥

忭躍之誠倍萬恆品

禮部賀白龍并青蓮花合歡蓮子黃瓜等表

臣某言伏見今日內出滄州所進白龍見圖又出西內
定禮池中青蓮花并神龍寺前合歡蓮子示百寮二十三
日又出鹽州所進合歡黃瓜圖者二氣交泰萬國同和動
植思協於殊祥遐邇畢陳其嘉應披圖按牒聖理彰明臣
誠歡誠慶頓首頓首伏以天地非遠睿感必通疊瑞重祥
累集宮禁池蓮表異靈化非常敷彼青光徵佛書而尤絕
成其嘉實驗祥經而甚稀積慶旁流自中徂外遂使龍騰

白質乘秋果應於金行瓜合黃中表聖更彰於土德遠通
邊徼近出苑園合慶同歡周於億兆况復邦畿之內雨霽
必時宿麥大穰嘉穀滋茂和風孕育靈氣陶蒸是皆發自
帝心達於天意周流升降成此歲功惠彼羣生自爲嘉瑞
臣某深惟多幸獲遇斯時觀靈貺之備臻知人和之溥洽
無任慶忭躍蹈之至

禮部賀白鵲表

臣某言伏奉進止宣示前件白鵲者霜毛皎潔玉羽鮮明
色實殊常性惟馴狎臣聞聖王之德無所不至有感則應

無幽不通伏惟陛下恩霑動植仁洽飛翔故得茲禽呈休
效質伏以白者正色實表金方鵲以知來式彰冠服用符
歸化之兆克耀太平之階臣職參禁垣獲覩嘉瑞無任慶
忭之至

禮部賀嘉瓜表

臣某等今日內出浙東觀察使賈全所進越州山陰移風
鄉產嘉瓜二實同蒂圖示百寮者寶祚惟新嘉瑞來應式
彰聖德克表天心臣等誠慶誠賀頓首頓首伏惟皇帝陛
下保合太和緝熙黎庶德馨上達神化旁行嘉瓜發瑞來

自侯服質惟同蒂見車書之永均地則移風知化育之方
始雖七月而食豳土歌王業之難五色稱珍東陵詠嘉賓
之會未聞感通若斯昭著者也臣某等遭逢聖運親仰珍
圖忭躍之誠倍百恆品無任慶悅之至

爲王京兆賀嘉蓮表

臣某言今日某時中使某奉宣聖旨出西內神龍寺前水
渠內合歡蓮花圖一軸示百寮者祥圖煥開異彩交映贊
天地之合德表神人之同歡臣某誠歡誠慶頓首頓首伏
惟皇帝陛下道協重華慶傳種德陶陰陽之粹美孕造化

之精英吉慶每見於天心發祥必自於禁掖是使雙華擢
秀連蒂垂芳香激大王之風影耀天泉之水煥開宮沼旁
映給園靈眈應期天龍護聖寶厯夏超於小劫神功允洽
於大千臣某獲覩昇平濫居榮寵聞瑞應而稱慶仰績事
而增歡無任忭蹈喜躍之至

欽定全唐文卷五百七十一目錄

新文藝出版社藏書

柳宗元 三

爲王京兆賀雨表一

爲王京兆賀雨表二

爲王京兆賀雨表三

爲王京兆賀雨表四

賀親自祈雨有應表

爲裴中丞賀克東平赦表

柳州賀破東平表

代裴中丞賀分淄青爲三道節度表

爲韋侍郎賀布衣竇羣除左拾遺表

爲樊左丞讓官表

爲王戶部薦李諒表

爲戶部王叔文陳情表

代裴中丞謝討黃少卿賊表

爲裴中丞舉人自代伐黃賊表

爲崔中丞請朝覲表

代柳公綽謝上任表

代李愬襄州謝上任表

代節使謝遷鎮表

爲劉同州謝上表

代裴行立謝移鎮表

代韋永州謝上表

謝除柳州刺史表

柳州謝上表

代廣南節度使舉裴中丞自代表

奏薦從事表

金史卷一百一十一
代廣南節度使謝出鎮表

爲楊湖南謝賜設表

爲武中丞謝賜櫻桃表

謝賜時服表

謝賜端午綾帛衣服表

及大會議戶部尚書班宏又請改所上尊號加奉
道字故其文如後表

及大會議國子祭酒韓洄請厯數近日徵應祥瑞
故又改其文如後表

爲崔中丞賀平李懷光表

爲武中丞謝賜新茶表

爲裴中丞賀破東平表

獻平淮夷雅表

上饒歌鼓吹曲表

賀赦表

欽定全唐文卷五百七十一

柳宗元 三

爲王京兆賀雨表一

臣某言臣昨日面奉進止以近日少雨今月內無雨卽須
祈禱今日便降甘雨者天且不違神必有據密雲與綸言
繼發時雨將天澤并流臣某誠歡誠慶頓首頓首伏惟皇
帝陛下憂切蒸黎慮深稼穡思彼未兆防於無形滲漉每
出於湛恩變化亦隨於廣運宸衷暫惕已矯御天之龍聖
謨旣宣遂洽漏泉之澤霑霽周布霏微四施黍稷盡成公

私皆及野夫鼓舞知帝力之元通官吏歡呼見天心之默
喻臣某牧人京邑動仰皇靈渥澤徒加涓滴無助無任感
悅屏營之至

爲王京兆賀雨表二

臣某言臣伏見今月二十四日時雨溥降伏以聖心積念
天意遽迴移造化之元功革陰陽之常數臣某誠慶誠忭
頓首頓首皇帝陛下仁育蒼生恩同赤子自頃天雨未降
時稼或愆貶食齋戒至誠幽達又慮宿麥無備播種失時
出於宸衷特令賑貸睿謨潛運甘雨遂周布濩垂陰隨聖

澤而俱遠滂沱積潤與恩波而共深臣某才術無聞謬司
邦甸生成必資於帝力進退何補於天工沐浴太和慚荷
無極無任慶躍屏營之至

爲王京兆賀雨表三

臣某言今月十三日面奉進止緣自春來少雨宜卽差官
精誠祈禱者十四日臣便差官分赴靈迹其日雲陰四合
至十五日甘雨遂降伏惟皇帝陛下言爲神化動合天心
未成旱暵之虞已積憂勤之慮衆靈受職薈蔚且躋於南
山百穀仰榮滂霈遂霑於東作睿謨朝降膏澤夕周知天

人之已交識陰陽之不測然則周王徒勤於方社殷帝虛美於桑林豈若無災而蚤圖未禱而先應化超前聖道貫重元徧野同歡傾都相慶臣之欣躍倍萬恆情

爲王京兆賀雨表四

臣某言臣於三月二十九日奉進止於諸靈迹處祈雨至三十日甘雨遂降者臣聞惟聖有作先天不違發令而祥風已興致誠而元液旋被臣某誠歡誠賀頓首頓首伏惟皇帝陛下側身防患邁邁周王盡力勤人功超夏后聖謨廣運驅百靈以從風神化旁行滋五稼而流澤油雲四合

膏雨溥周農壤遂一於肥磽滲漉盡霑於遐邇蒸黎詠德知必自於聖心草木欣榮如有感於皇化有年之慶實在於斯臣以無能謬領京邑上勞宸慮運此歲功無任喜懼屏營之至

賀親自祈雨有應表

臣某言臣得上都院官金部員外郎韓述狀報以時雨未降親自於龍堂祈禱有靈禽羣翔自成行列如隨威鳳以翼龍舟其日降雨者伏以時或愆陽歲之常候式當聖日無害豐年陛下敦本務農憂人閔雨宸慮所至天心自通

故得瑞鳥迎舟掩商羊之舞僊雲覆水協從龍之徵初泛
灑於上宮遂滂霈於率土自中徂外皆荷生成雨公及私
靡不碩茂殷后徒勤於自翦周公空媿於舞雩臣以庸虛
謬司垣翰有年之慶惟聖之功臣某不任

云云

爲裴中丞賀克東平赦表

臣某言伏奉月日德音以淄青蕩平褒功宥罪布告遐邇
者臣聞肅殺之後每致陽和雷霆旣施必聞膏澤伏惟陛
下體乾剛以運行叶坤元之翕闢百靈受職六合從風阻
兵怙亂者必就梟擒懷忠抱義者無不甄錄激其效順特

加旄節之榮寵以元功遂兼鼎鉉之任戎行窮賞賚之重
死事極褒卹之優劫脅之役盡除聚斂之名皆去傷痍受
煦老疾加恩豐財已復其征徭賜種更盈於種稂嚴山川
之祀神必有依申義烈之家物無不感周王推忠厚之化
漢帝慚愷悌之風太平之德斯爲至盛然則虞巡可復告
成將慶於岱宗漢典方行講禮再榮於闕里臣謬膺重寄
獲覩太和忭蹈之誠倍萬恆品謹已施行郡邑宣示軍戎
莫不動地歡呼若醉千鍾之酒騰天鼓舞如聞九奏之音
無任慶賀踊躍之至

柳州賀破東平表

臣某言卽日被觀察使牒李師道以月日克就梟戮者帝
德廣運唐命惟新霾曠廓清天地貞觀率土臣庶慶忭無
涯伏惟睿文聖武皇帝陛下威使百神德消六沴天降寶
運時歸太平自克夏擒吳翦蜀平蔡殊類稽顙羣疑革心
惟此兇妖尚聞悖慢庭議旣得廟謨必臧旌旗燭耀於洪
河金鼓震驚於靈嶽郛城自潰寧同莒魯之爭齊地悉平
無俟耿陳之戰五兵永戢七德無虧含生比堯舜之仁率
土陋成康之俗介邱霧息已望翠華之來沂水風生更起

舞雩之詠千歲之統實在於斯臣守在蠻荒獲承大慶忭
蹈之至倍萬恆情

代裴中丞賀分淄青爲三道節度表

臣某言伏見某月日制分淄青諸州爲三道節度都團練
觀察等使者蛇豕之穴忽爲樂郊氛沴之餘盡成和氣伏
惟皇帝陛下天付昌期神開寶厯復昇平之土宇拔妖孽
之根源自西自東不違於指顧我疆我理咸得其區分山
川備臨制之形道途適征徭之便俾侯旣定賜履以寧異
青兗之封爰從古制解曹衛之地實契雅謀車甲永藏馬

牛勿用俗被雍熙之化代知仁壽之期農事載盛於耨芟
儒風重興於俎豆足使季札觀魯更陳南籥之儀山甫徂
齊復正東方之賦臣總戎遠地不獲陪賀闕庭

闕

爲韋侍郎賀布衣竇羣除左拾遺表

臣某伏見今日日制除布衣竇羣左拾遺者臣聞直道之
行四方嚮德逸人是舉天下歸心臣伏以竇羣肥遯居貞
包蒙養正學術精果操行堅明讚詠道真以求其志臣頃
守藩服特所委知及歸朝廷輒有聞薦庶逃竊位之責以
塞曠官之尤豈謂天聽曲從瞽言無廢况諫諍之職政化

是參擢於布衣久無其比周行慶忤林藪震驚晦迹寧慮
於遺賢懷才盡思於展效臣以性本庸疎動無裨益惟思
進拔以報恩榮區區懇誠實貫金石言而不廢微臣敢竊
於薦雄德必有鄰聖代式光於尊隗自羣受命冀復面陳
迫以疾病接於休假注心蓄念寤寐兢惶無任喜躍屏營
之至

爲樊左丞讓官表

臣某言伏奉今月二十八日制除臣尚書左丞寵命俯臨
慚顏自失泛大鯨之海但覺魂搖戴巨鼈之山未如恩重

臣聞尚書百揆翊亮萬機故天上尊北斗中樞陛下有南宮左轄晉昇孔坦諒直當時漢拜楊喬閑練故事庶得百僚有憚於會府諸侯取法於京師臣實謏才謬登清貫握蘭起草昔素朝經剖竹頒條近貽人瘼備厯中外無聞聲彩版圖載緝貢賦未均於九州銅印更操威儀不檢於三署次郎補缺豈易其人聖主求才宜難此受竊謂旁求俊乂側訪瓌奇必使德合準繩言成綱紀興化致理時無間言况安上必在於薦賢危身莫踰於曠職儻蒙垂收紫渙俯矜丹誠愚臣保陳力之言聖鑒有責成之地無任覲冒

惶悚之極謹詣朝堂奉表陳讓以聞臣所讓人別狀封進
爲王戶部薦李諒表

臣某言臣聞知賢必進忠臣之大方擇善而居明主之要
道况臣特受恩遇超絕古今報國之誠寤寐深切是敢竭
愚臣之微分助陛下之至明恢張羽儀宏輔治化臣某誠
惶誠恐頓首頓首竊見新授某官李諒清明直方柔惠端
信強以有禮敏而甚文求之後來略無其比臣自任度支
副使以諒爲巡官未及薦聞至某月日荆南奏官敕下赴
本道諒實國器合在朝行臣之所知尤惜其去伏望天恩

授以諫官使備獻納冀他日公卿之任斯焉取斯則聖朝無乏士之名微臣緩蔽賢之罰無任誠懇屏營之至

爲戶部王叔文陳情表

臣某言臣母劉氏今月十三日忽患瘖風發動狀候非常今雖似退猶甚虛憊驚惶憂苦不知所圖臣惟一身更無兄弟侍疾嘗藥難闕須臾伏乞聖恩停臣所職今臣見在家扶持其官吏等並已發遣訖臣以庸微特承顧遇拔自卑品委以劇司夙夜兢惶惟思荅效至誠至懇天睠所知豈慮未效涓塵遽迫方寸以開塞重輕之務加焦勞憂灼

之懷雖欲徇公無由枉志况忠孝同道臣子之心許國誠切於死生報恩忍忘於顧復進退窮感昧死上陳候母劉氏疾疢小瘳冀微臣駑蹇再效無任惶懼懇倒鳴咽之至

代裴中丞謝討黃少卿賊表

臣某云

云即日奉事官米蘭迴伏奉手詔云

云者臣聞膚

革旣平雖疥癬而必去豺狼已斃在狐鼠而宜除臣某中謝伏惟元和聖文神武法天應道皇帝陛下受命上元底寧下土兇渠盡殄威武載揚蠢爾腥羶尚聞凌暴靈旗斜指銅獸俯臨三軍知必勝之方萬姓喜永清之路微臣忝

司戎律親列顏行躡伏波之舊規乘下瀨之故事盡瘁事
國期畢命於戈矛不宿於家思奮身於原野卽以今日某
時出師就道便披榛蹶石摩壘陷堅蕩清海隅永息邊徼
竊以才非充國敢自贊於無踰志慕孟公庶追蹤於不伐
謬承重委寤寐兢惶無任感恩隕越之至

爲裴中丞舉人自代伐黃賊表

伏以某官器宇端方風姿詳雅謙虛內敏籌略共推前佐
湖南悉心匡佐後厯郡掾深負政聲惠愛在人姦邪屏息
勤勞已著幹蠱無倫今黃賊尚據荒陬犬窠未覆儻以某

代某之任必能掃蕩氛祲廓清海濱竊惟斯人雅堪厥職
爲崔中丞請朝覲表

臣厯刺三州連總二府外任逾紀入覲無階就日望雲魂
飛心注伏惟睿聖文武皇帝陛下覆載無私遐邇同致復
昇平之故事繼前聖之高蹤中外踐更出入迭用臣以虛
薄叨受恩榮徒竭夙夜之心未申朝夕之敬天威咫尺誠
寤寐而無違雲漢昭回固瞻仰而何及是以前在朗寧封
章累上及移臨桂星紀屢周微衷尚隔於戴盆積望徒懸
於窺管葵藿之誠彌切犬馬之戀逾深人欲天從於茲未

驗下情上達終冀不誣敢瀆宸嚴罄陳丹懇伏乞賜臣除
替許至闕庭廁蹈舞於羣僚備班行於散地足趨中禁目
覩大明俾成九族之榮以盡百生之幸非敢竊國賓五獻
之禮希康侯三接之恩一覲龍顏萬死爲足無任懇迫激
切之至

代柳公綽謝上任表

肅恭休命晨夜趨程祇荷寵私不遑寢食以月日到所部
上訖云臣聞古之制爵祿者爵以居有德祿以養有功
臣本書生宦不期達值某皇帝文明撫運大闡元猷搜采

眾才幸忝甄錄厯踐中外星霜屢移曾無涓塵上答鴻造
忘其薄陋委以雄藩顧無綏馭之能謬忝澄清之寄將何
以敷宣皇澤普諭天慈惟當察慝以爲防視俗而爲教蠲
除細故務安黎獻庶幾清靜無擾以慰遠人臣不勝忝冒
荷恩之至

代李愬襄州謝上任表

捧對絲綸慚悸無地拜命兢悚不知所裁臣凡賤瑣才智
略無取幸賴先臣緒業累忝國恩天澤曲流遂司節制寄
深分閫任重專征顧無將領之才謬處衆人之上豈謂宸

私軫念仁育爲心霈澤無涯德音屢降士衆感悅咸思竭忠遂得潛師暗入賊境不意兇渠就戮此皆聖謨豈敢叨天以爲已力仰荷殊造重於邱山臣以月日上訖謹當敷宣皇化普諭聖慈綏撫三軍乂安百姓冀以塵露上答鴻私

代節使謝遷鎮表

鴻私曲臨獨越夷等祇荷明命寤寐不遑臣才非器能謬膺仕進雖竭盡駑劣力效忠勤冀寡愆尤敢望宦達某宗皇帝不以臣儒術淺薄超授禮官尋遷正郎遂忝符郡某

皇帝不遺臣小善擢處諫曹叨承厚恩備職藩翰顧惟瑣劣多慚負恩伏遇陛下德紹唐虞無私庶政臣尸素歲久譴謫宜加豈冀褒昇更遷重鎮再忝澄清之寄仍同獻替之榮將何以上答天慈下安氓庶臣當務修農稼率勵遠人鋤其姦慝以副勤恤無任云云

爲劉同州謝上表

臣某言伏奉某月日制除臣同州刺史兼本州防禦營田長春宮使某月日到州上任訖臣初奉綸言震忤無極及臨所部驚懼逾深投軀莫報於乾坤陳力無裨於造化臣

某誠惶誠恐頓首頓首臣出自諸生不習爲吏有恒懦之
質無區處之能託迹儒門乏仲弓南面之德委身郎署闕
馮唐論將之對常懼叨冒清列蕪穢聖朝豈意天聽忽臨
鴻恩薦及八命作牧一麾出守拔自下位寄之雄藩非臣
庸瑣所宜膺據况馮翊密邇王都古稱三輔爰自近代命
秩逾崇有兵食之虞有宮室之制皆公卿將相出入由之
仰徵甲令俯窺圖記跼蹐無地以兢以惶恩重命輕不知
所效庶當刻精運力夙夜祇勤上奉雍熙旁流愷悌以日
繫月儻或有成庶幾之心懷懷增惕徒望雲而就日喜近

帝鄉將擊壤以成風共歌堯代天威咫尺敢布丹誠無任
悃懇屏營之至

代裴行立謝移鎮表

星言卽駕便道之藩祗荷寵榮不敢寧息臣某爰自弱齡
卽忝推擇階緣試吏累忝清資先聖以臣麤知兵要俾統
師徒交蠻俶擾黃賊不馴奉詔俾臣撲滅氛祲士衆賈勇
思酬渥恩冀因此時得立微效豈謂時多疫癘不副憂勤
知臣特深復洗瑕責夙夜感戴捐軀有期徒增憤勇力未
從願微臣不幸釁故重重泣血摧肝載崩載咽陛下龍興

御極寰海永清道暢八埏威加九域鴻和普洽靡不周泰
伏蒙累垂休命遂越等夷循省何人過膺抽擢况臣比臨
此鎮備更夷險故材舊壤宛在目前雖則殊鄉還同衣錦
量巨鼇之力未足負恩猶蚊蚋之微焉能報德將何以宣
揚聖造撫慰疲羸惟當遵守詔條貶棄奸慝平勻徭賦示
以義方持清靜以臨人守無私以奉國重修前志再礪戈
矛展駑駘之效申鷹犬之用庶荒陬夷獠盡沐皇風率土
生靈備聞斯慶微臣之志也限以云云

代韋永州謝上表

臣某言伏奉月日制書除臣永州刺史以月日到州上訖受命若驚臨職彌懼臣以無能累更事任神州赤縣實所備嘗過量逾涯每深兢惕不謂聖恩推擇濫駕朱輪祿秩徒增詎施乳哺之惠服命虛受寧興襦袴之謠况此州地極三湘俗參百越左衽居椎髻之半可墾乃石田之餘曠牧守於再秋彌驕獷俗代徵賦於三郡重困疲人分災本出於一時積弊遂逾於十稔撫安未易知法出而姦生子育誠難懼力勞而功寡夙夜憂切不敢遑寧庶當宣布天慈奉揚神化以日繫月儻或有成少裨愷悌之風用答生

成之造無任感恩隕越之至

謝除柳州刺史表

早以文律參於士林德宗選於眾流擢列御史陛下嗣登寶位微臣官在禮司百僚稱賀皆臣草奏臣以不慎交友旋及禍訕聖恩宏貸謫在善地累更大赦獲奉詔追違離十年一見宮闕親受朝命牧人遠方漸輕不宥之辜特奉分憂之寄銘心鏤骨無報上天謹當宣布詔條盡竭駑蹇皇風不異於遐邇聖澤無間於華夷庶答鴻私以塞餘罪

云

柳州謝上表

臣某言伏奉詔書授臣柳州刺史以今月二日至部上訖
中謝臣前歲以久停官秩去年蒙聖恩除替便欲裂裳裹
足趨赴京師以舊疾所嬰彌年未愈逮及今夏始就歸途
襄陽節度使于頔與臣蚤歲同官見臣當暑在道懇畱在
館尋假職名意欲厚臣非臣所願伏惟陛下光被之德道
已洽於區中憂濟之勤心每徧於天下常以萬邦共理必
藉於循良一物不遺尚延於愚競假臣寵渥重領方州驚
駘復效於奔馳枯朽更同於華秀臣聞潢汙易竭抑有朝

宗之願犬馬無識猶知戀主之誠揣分則然惟天知鑒况臣昔因左官一紀於外子牟馳心於魏闕汲黯積思於漢庭豈非夫人獨無斯戀去就者榮辱之主朝廷者仕進之源臣子之宜忠貞所志臣雖心同犬馬而分比潢汙幸躡康衢意非往蹇臣之此誠口不能喻意欲悉達文非盡言此臣所以自咎自恨復乖志願猶冀苦心勵節上奉詔條惠寡卹貧下除人瘼恭宣皇化少答鴻私不勝懽欣之至

代廣南節度使舉裴中丞自代表

前件官器宇深沈天才間出爰從撫字逮於察廉所職恪

勤庶務皆勸日者安南夷獠反叛害其連帥毒瘃黎人某
皇帝以某威惠茂著自某州刺史俾之撫臨夙夜經行盡
除兵器賊徒識恩黨種歸義炎荒之俗靡不底寧後改鎮
容州勲效彌顯澄清庶類邁德前修深負能名合遷重鎮
臣自惟凡懦不逮前人伏乞天恩迴授某非惟旌德是亦
飾能庶微臣免尸祿之憂某獲無私之舉

奏薦從事表

某績茂戎軒才優管記操刀必割豈謝剗犀落筆不休寧
慚倚馬況蚤登科選夙洽時譚匪惟詞藝雙美抑亦器能

多適比於流輩頗爲滯淹輒敢薦陳伏希獎錄

代廣南節度使謝出鎮表

鴻霈曲臨惶駭交集捧對綸綍不知所圖臣中謝臣聞蕭
曹佐漢六合爲家奭望匡周萬方同軌臣幸以芻賤累忝
殊榮天德薦臨遂加台政不能翊宣明聖增日月之光俾
兇渠勦絕人用康寧實由臣不稱職使此艱患伐檀興議
負乘招譏常懷覆餗之虞敢望專征之寄獻俘未遠展效
有期希此微功上答殊造無任云云

爲楊湖南謝賜設表

臣某言中使某乙至奉宣聖旨賜臣長樂驛設者恩榮特殊宴飲斯及顧茲厚禮猥集微躬臣某誠歡誠慶頓首頓首臣以多幸屬此昌時任重方隅職忝文武甘受素餐之刺知無肉食之謀以憂以惶寤寐無措豈謂鴻恩繼至豐膳爰來陸海兼陳飴醴皆設庶當奉揚聖澤覃布遠人流愷悌於皇風均乳哺於赤子少陳微效上答殊私無任感恩欣躍之至

爲武中丞謝賜櫻桃表

臣某言中使某至奉宣聖旨賜臣櫻桃若干者天睠特深

金史卷一百一十一
時珍薦降寵驚里巷恩溢圓方臣某誠喜誠懼頓首頓首
伏以含桃之羞時令攸貴况今采因御苑分自天廚使發
九霄集繁星而積耀味調六氣承湛露而不晞盈眚而外
被恩光適口而中含渥澤顧慚素食彌切自公豈圖君子
所先遂厭小人之腹無任感恩欣喜之至

謝賜時服表

祇荷寵私啟處無地臣中謝臣久忝朝行厯職無效荏苒
星紀偷榮歲時不能少益聖猷以副深寄致使賊遺君父
艱難未息合處嚴憲以正國章伏以陛下恢天覆之恩廣

地載之厚不循彝典俾同冕紱重劇邱山捧戴以入閨門
空知夕惕裁縫而爲衣服固可晝行內省疲駑將何答效
謝賜端午綾帛衣服表

綸言曲臨寵服薦至跪捧殊錫慶躍交并臣中謝臣謬典
方州效微涓滴叨承大貺榮重邱山非才忝恩俯伏慚荷
朱明啟節御府賜衣沐聖澤而溟海方深被僊衣而鶴龜
齊壽馳心向闕跼影望天慚分五嶺之憂莫副九重之詔
臣無任云云

及大會議戶部尚書班宏又請改所上尊號加奉

道字故其文如後表

伏以睿智之周物而靡不通不可以不稱夫聖也妙算之
無方而莫能測不可以不稱夫神也行仁義修典法歌詩
頌考文章不可以不稱夫文也攘卻戎夷戡翦暴逆邊兵
以整禁衛以嚴不可以不稱夫武也而合於唐堯乃聖乃
神乃武乃文之德博施不息而萬物以生推功不宰而萬
化以成合於書之奉若天道之義臣等謹稽之乾符叶於
古典侔德澤之廣配功業之崇昧冒萬死伏請上尊號曰
聖神文武奉道皇帝

及大會議國子祭酒韓洄請厯數近日徵應祥瑞
故又改其文如後表

又伏見陛下以今年四月以來方當雩祭之修而有旱備
之請纔愆期而未害於物深軫念而將卹其人氣潛通而
交感以和澤旋流而霂霈斯遠由是風雨時而霜雹不降
稼穡茂而蝗螟不生農功以成年穀大熟休祥數見福應
屢臻仁木連理而垂陰嘉禾同穎而挺秀壽星舒景炎之
盛芝草布葩英之重白鸞凝彩而雪輝蒼烏取象於天色
將徧於郡國相繼於歲時右具如表

爲崔中丞賀平李懷光表

臣某言伏奉某月日敕逆賊李懷光興臺末人奚虜遺醜
備聞兇險之行頗有殘暴之名陛下略其細微假以符節
盡委朔方之地猶分禁衛之兵不感殊私乃懷異望間者
饋貢不入王師問罪尋令舉軍赴敵而乃終歲無功洎駕
幸近郊敕還舊鎮將掃猾夏之盜因解奉天之圍豈伊人
謀蓋是天意陛下但嘉其排難不省其由列爲上公命作
元帥及躡寇滑汭頓軍咸陽

闕

爲武中丞謝賜新茶表

臣某言中使竇某至奉宣旨賜臣新茶一斤者天睠忽臨
時珍俯及捧戴驚忭以喜以惶中謝臣以無能謬司邦憲
大明首出得親仰於雲霄渥澤遂行忽先霑於草木况茲
靈味成自遐方照臨而甲圻惟新煦嫗而芬芳可襲調六
氣而成美扶萬壽以效珍豈臣賤微膺此殊錫銜恩敢同
於嘗酒滌慮方切於飲冰撫事循涯隕越無地臣不任感
戴欣忭之至

爲裴中丞賀破東平表

臣某言月日得進奏官狀報逆賊李師道以某月日克就

梟戮率土臣子慶忭無涯中謝臣聞負恩千紀者鬼得而
誅犯順窮兇者天奪其魄不自妖孽曷彰聖功伏惟陛下
先天不違與神合契掩周宣中興之業陋漢光再造之勳
靈旗四臨氛沴皆散凡在臣庶盡覩昇平伏以師道席父
祖以作威苞海嶽而專祿恃東秦十二之險誘臨淄三七
之兵竊據一方歲踰五紀朝宗之地曠若外區封祀之山
隔成異域累聖垂德曾未悛心餘孽滔天果聞折首遂使
云亭有主知玉牒之將封遼海無虞見石碣之已至此皆
陛下神籌獨得廟略無遺授任推盡力之誠縱捨有甘心

之化金石可貫龜筮必從克成不戰之功遂洽無爲之理
臣謬司戎旅遠守方隅愧無橫草之功坐見覆盂之泰忭
蹈歡慶倍萬恆情

獻平淮夷雅表

臣某言臣負罪竄伏違尚書牋奏十有四年聖恩寬宥命
守遐壤懷印曳紱有社有人云云伏惟睿聖文武皇帝陛
下天造神斷克清大憝金鼓一動萬方畢臣太平之功中
興之德推校千古無所與讓臣伏自忖度有方剛之力不
得備戎行致死命況今已無事思報國恩獨唯文章伏見

周宣王時稱中興其道彰大於後罕及然徵於詩大小雅其選徒出狩則車攻吉日命官分土則崧高韓奕烝人南征北伐則六月采芑平淮夷則江漢常武鏗鉤炳耀盪人耳目故宣王之形容與其輔佐由今望之若神人然此無他以雅故也臣伏見陛下自卽位已來平夏州夷劍南取江東定河北今又發自天衷克翦淮右而又大雅不作臣誠不佞然不勝憤踊伏以朝多文臣不敢盡專數事謹撰平淮夷雅二篇雖不及尹吉甫召穆公等庶施諸後代有以佐唐之光明謹昧死再拜以獻

上饒歌鼓吹曲表

臣宗元言臣幸以罪居永州受食府廩竊活性命得視息無治事時恐懼小間又盜取古書文句聊以自娛伏惟漢魏以來代有饒歌鼓吹詞唯唐獨無有臣爲郎時以太常聯禮部嘗聞鼓吹署有戎樂詞獨不列今又考漢曲十二篇魏曲十四篇晉曲十六篇漢歌詞不明紀功德魏晉歌功德具今臣竊取晉魏義用漢篇數爲唐饒歌鼓吹曲十二篇紀高祖太宗功能之神奇因以知取天下之勤勞命將用師之艱難每有戎事治兵振旅幸歌臣詞以爲容且

金史卷之五十二
得大戒宜敬而不害臣淪棄卽死言與不言其罪等耳猶
冀能言有益國事不敢效怨懟默已謹冒死上

賀赦表

臣某伏奉某月日恩制大赦天下一人有慶百度惟新戴
天履土罔不欣忭中謝某聞天地成功施雨露而育物帝
王繼統昇日月以垂曜羣品資始萬方文明伏惟陛下嗣
守鴻業光膺駿命淳化均於四序大德合於二儀保寧社
稷光宅區宇宏孝慈以御下崇恭儉以垂休恩覃溪洞事
貫千古況乃順時布政乘春導和敷作解之澤宣在宥之

典九族旣睦四門廣闢而又洗滌幽蟄雷雨之施也歸還
流竄羅網之釋也移敎貶黜覆載之仁也蠲除逋債政理
之源也褒寵勲賢激勸之方也廢金寶之貢有以彰儉德
搜遺逸之士有以表至公元勲宿將賞延子孫庶尹卿士
榮周存歿廣直言之路啟進善之門德超虞夏道掩軒項
必將平一殊俗發揮大猷億萬斯年永荷天緒臣謬當任
用守職藩維不獲奔赴闕庭親覩盛禮感悅歡忭倍萬恆
情

